

SAVOGNIN: Uffer SA

Treis partenaris – en intent

G.N.S. La Uffer SA da Savognin expandescha e collaborescha aint igl avignair cun la Zindel United da Maiavilla. Cun Michael Hartweg vign anc vetiers en ulteriour partenari innovativ, tgi ò bungs contacts tar igl mond dalla digitalisaziun e dallas finanzas.

Ter mesemda ò Enrico Uffer, igl patrung dalla Uffer SA a Savognin. anvido igls represchentants dallas medias ad ena conferenza da pressa. Igl tema central da chella è sto igl partenadi dalla Uffer SA cun la Zindel United e cugl impressari da finanzas Michael Hartweg. La Uffer SA, en travagl cun ena gronda tradiziun, ena firma tgi è en grond patrung ed en menaschi general ainten la branscha da construcziun, collaborescha da nov cun la Zindel United. Gist scu l'interpesa dad Encrio Uffer è er chella dad Andreas Zindel en menaschi da famiglia, cun ena tradiziun da passa 200 onns. Ainten la Valragn grischuna è la Zindel United cun passa 300 luvrants egnas dallas grondas interpresas, chegl tgi vala igl madem per la Uffer SA an Surmeir, cun igls sies 80 ampluias.

Cun Michael Hartweg en partenari serious e fido

Communabel aint igl avignair ed an cuminanza sen la veia commerciala von la Uffer SA e la Zindel United cun Michael Hartweg. Ainten la nosa regiun ins canoscha el scu investour dalla «Tgesa Nordica» dall'Arena da biatlon a Lantsch e scu grond promotour da chel sport nordic. Michael Hartweg ins canoscha dantant er scu en om serious, scu en impressari fido e cunzont scu ena persunga simpla ed er gentila. Tgi el collaborescha aint igl avignair cun Enrico Uffer è strusch ena sorpresa, cun bagnspert aver vasia Michael Hartweg, tgi la Uffer SA lavoura solid, innovativ e visiunar. Durant la construcziun dalla «Tgesa Nordica» ed er tar l'avertura da chel bietg igl december 2016 ò igl impressari da finanzas adegna puspe menziuno la fitg buna collaboraziun cun Enrico Uffer, scu impressari general per la realisaziun da chel object, tgi è nia construia cun moduls da lenn fabricatias a Savognin.

La digitalisaziun vign cun gronds zaps

La lavour exacta e la collaboraziun amicabla cun Enrico Uffer scu er igl svilup permanent dalla Uffer SA è en bagn igl fundamain pigl partenadi da Michael Hartweg cun Enrico Uffer. Tant el scu er Andreas Zindel, tots dus vignan a



(da san.) Andreas Zindel, Andrea ed Enrico Uffer e Michael Hartweg on sagialo ena furma da collaboraziun libra ed innovativa.

profitar digl impressari da finanzas tgi ò ena pulita experienscha schi sa tracta dad ideas per interpresas innovativas, scu acquistar novas fieras e cunzont er tge tgi dovra per sa derasar ed expandar. Ultra da chegl ò Michael Hartweg er ena saveida gidevla per dumondas schi vo per la digitalisaziun tgi fò da de tar de en pi grond progress. Enrico Uffer dei tgi er la branscha da construcziun mitscha betg dalla digitalisaziun. Cun Michael Hartweg scu partenari, vegia la Uffer SA, chegl tgi pertotga igl process da producziun automatiso e digitaliso en om da gronda valour ainten la «bartga». Cugl om digl rom ins seia aint igl futur er pront da sa vischinar ad ena otra dimensiun, punctuescha igl patrung dalla Uffer SA.

Planget betg ple la capaciad

Er chegl tgi pertotga igl volumen less Enrico Uffer aint igl avignair aver ena otra dimensiun. El scu impressari general, vot deir, tgi el è igl om da contact tar igl architect, tar las interpresas da construcziun e tar la persunga tgi biegia ena tgesa u en oter bietg. Cun catter cun Andreas Zindel en partenadi tgi è strategic scu er operativ digl madem meini e cunzont er en travagl tgi vo bagn a pèr cun la Uffer SA, è Enrico Uffer persvas, tgi la collaboraziun cun la Zindel SA fò senn e porta igls fretgs duevels.

La firma cun dimora a Maiavilla è en travagl multifunziunal tgi è activ sen ples camps dalla branscha da construcziun. Cun la collabora-

ziun pi strètga cun la Zindel SA, less la Uffer SA er far ensatge per la capaciad tgi è graztga all'istorgia da success da «Quadrin» oz prest agl limit. La collaboraziun cun la Zindel SA, Michael Hartweg e la Uffer SA è er chegl tgi pertotga la siertad digls plazs da lavour betg angal per Surmeir da gronda valeta, mabagn er pigl Grischun central.

Per nous ena veira furtegn

Betg angal Enrico Uffer è cuntaint dad aver catto dus partenaris innovativs, mabagn dad ena veira furtegn discorra perfign Andreas Zindel. Igl dus patrungs deian igl suandont: «Per igls noss cliants ed igls noss partenaris restan las fatschas, dantant igl sortimaint chel crescha». Igl schinumo «knowhow» è pi cumplessiv, las veias pi pitschnas e la capaciad pi gronda. Graztga alla cooperaziun ins seia abel da porscher agl avignair en pi grond sarvetsch general e chegl per l'antiera construcziun. Per rinforzar la collaboraziun sa participeschan la Zindel SA e Michael Hartweg cun en domber minimal dad aczias alla Uffer SA. L'interpresa da Maiavilla segna pitost per la planisaziun da construcziun, dantant tgi produtgia vign ple u manc igl ple a Savognin ainten la halla existenta ed er ainten la nova halla tg'ins è igl mument da construir. Per mangs da realisar ò la Uffer SA da preschaint er igls «Quadrins» pigl Festival «Moon & Stars» a Locarno, en openair da musica tgi totga an Svizra tar egn digls pi ancunshaints e populars.